

結論：如來藏俱非俱即世出世法，離即離非，是即非即

富樓那！汝以色空，相傾相奪於如來藏，而如來藏隨為色空，周遍法界。是故於中，風動、空澄、日明、雲暗，眾生迷悶，背覺合塵，故發塵勞有世間相；我以妙明，不滅不生合如來藏，而如來藏惟妙覺明，圓照法界。是故於中，一為無量，無量為一；小中現大，大中現小。不動道場遍十方界，身含十方無盡虛空，於一毛端現寶王剎，坐微塵裏轉大法輪，滅塵合覺，故發真如妙覺明性。而如來藏本妙圓心，非心、非空、非地、非水、非風、非火，非眼、非耳鼻舌身意，非色、非聲香味觸法，非眼識界，如是乃至：非意識界；非明無明，明無明盡；如是乃至：非老、非死、非老死盡；非苦、非集、非滅、非道、非智、非得。非檀那、非尸羅、非毘梨耶、非羼提、非禪那、非般剌刺若、非波羅密多。如是乃至：非恒闍阿竭、非阿羅訶，三爺三菩、非大涅槃、非常、非樂、非我、非淨。以是俱非世出世故，即如來藏元明心妙，即心、即空、即地、即水、即風、即火，即眼、即耳鼻舌身意，即色、即聲香味觸法，即眼識界，如是乃至：即意識界，即明無明、明無明盡，如是乃至：即老、即死、即老死盡。即苦、即集、即滅、即道、即智、即得；即檀那、即尸羅、即毘梨耶、即羼提、即禪那、即般剌刺若、即波羅密多；如是乃至：即恒闍阿竭、即阿羅訶，三爺三菩、即大涅槃、即常、即樂、即我、即淨。以是俱即世出世故，即如來藏妙明心元，離即離非，是即非即。如何世間三有眾生，及出世間聲聞緣覺，以所知心，測度如來無上菩提，用世語言，入佛知見？譬如琴瑟、箏篴、琵琶，雖有妙音，若無妙指，終不能發。汝與眾生，亦復如是，寶覺真心，各各圓滿，如我按指，海印發光；汝暫舉心，塵勞先起。由不勤求無上覺道，愛念小乘，得小為足。（第四卷）